



**SLUŽBENI GLASNIK
NOGOMETNOG/FUDBALSKOG SAVEZA BOSNE I
HERCEGOVINE**

„NOGOMET/FUDBAL BIH“

PRAVILNIK O STATUSU TRENERA

Godina XVII Sarajevo, juni/lipanj 2011. godine Vanredni broj

**NOGOMETNI/FUDBALSKI SAVEZ
BOSNE I HERCEGOVINE**

**P R A V I L N I K
O STATUSU TRENERA**

Sarajevo, Juni/Lipanj 2011. godine

Na osnovu odluke FIFA Komiteta za hitnost od 12.04.2011. godine, i Člana 35. Statuta Nogometnog/Fudbalskog saveza Bosne i Hercegovine, Komitet za normalizaciju NS/FS BiH, na sjednici održanoj 29.06.2011 godine, d o n o s i:

P R A V I L N I K

o statusu trenera

I OPŠTE ODREDBE

Član 1.

Ovim Pravilnikom se na jedinstven način reguliše pojam trenera, njegov status u smislu izdavanja takmičarske akreditacije, prava na rad, ugovori trenera i način rješavanja spornih pitanja.

Član 2.

Pod pojmom trener podrazumijevaju se lica koja su završili UEFA „B“, UEFA „A“ ili UEFA „PRO“ nivo edukacije trenera.

II TRENERKE TAKMIČARSKE AKREDITACIJE

Član 3.

Trenerske takmičarske akreditacije daju mogućnost trenerima iz Člana 2. ovog Pravilnika da vode ekipe u svim zvaničnim Prvenstvenim i Kup utakmicama njihovih klubova ovisno o rangu takmičenja u Bosni i Hercegovini.

Utvrđuju se slijedeće takmičarske akreditacije:

- Takmičarska akreditacija „B“
- Takmičarska akreditacija „A“
- Takmičarska akreditacija „PRO“
- Privremena takmičarska akreditacija „B“

Takmičarske akreditacije „B“, „A“ i „Pro“ su ekvivalentne UEFA B, UEFA A i UEFA Pro licencama izuzev privremene takmičarske akreditacije „B“ koje se izdaju u skladu sa Članom 7. ovog pravilnika.

Član 4.

Za dobijanje takmičarske akreditacije „B“, „A“ i „PRO“ trener mora ispuniti slijedeće uslove:

1. Zahtjev kluba za izdavanje takmičarske akreditacije
2. Dokaz o posjedovanju validne UEFA licence
3. Prisustvo jednodnevnom seminaru
4. Dvije fotografije (dimenzija kao za ličnu/osobnu kartu)
5. Uvjerenje o državljanstvu (kopija lične karte ili pasoša ili na uvid)

Član 5.

Takmičarska akreditacija treba da sadrži:

- ime i prezime trenera
- broj licence
- sliku
- godinu validnosti
- nivo takmičenja na koji se odnosi (B, A ili Pro)
- Potpise

Član 6.

Za izdavanje takmičarskih akreditacija, stranim državljanima uz uslove iz Člana 4, potrebno je dostaviti dozvolu za rad na teritoriji BiH izdatu od nadležnog organa.

Član 7.

Trener koji ne ispunjava uslove navedene u Članu 4. stav 2, za sticanje takmičarskih akreditacija „B“, „A“ i „PRO“ izdaje se privremena takmičarska akreditacija koja im omogućava vođenje selekcija navedenih u Članu 12 stav III.

Privremena takmičarska akreditacija „B“ se izdaje trenerima koji su započeli pohađanje i upisali se na UEFA B program obuke koji priznaje NS/FS BiH.

Privremena takmičarska akreditacija „B“ izdaje se samo državljanima Bosne i Hercegovine.

Član 8.

Takmičarsku akreditaciju izdaje Centar za edukaciju trenera N/FS BiH, a organizatori seminara su savezi koji su nadležni za određeni nivoa takmičenja.

Član 9.

Uplate po osnovu učešća na seminaru za takmičarske akreditacije se vrše na račun nogometnih/fudbalskih saveza koji su organizatori seminara u iznosima koje samostalno utvrde izvršni odbori tih saveza, stim da cijena takmičarske akreditacije ne može biti veća od cijene UEFA licence. Sva prikupljena sredstva predstavljaju prihod savezu koji je organizator seminara.

Validnost takmičarske akreditacija

Član 10.

Takmičarske akreditacije izdaju se u principu početkom godine, prije početka drugog dijela prvenstva. Validnost trenerske akreditacije se odnosi na tekuću godinu i ističe 31.12. godine u kojoj je izdata. Za novu kalendarsku godinu, potrebna je nova takmičarska akreditacija.

Naknadno izdavanje takmičarskih akreditacija

Član 11.

Naknadno izdavanje takmičarskih akreditacija je moguće u izuzetnim situacijama, uz zahtjev kluba kod zamjene i angažovanja novog trenera. Uz ispunjavanje uslova iz

Člana 4. (izuzev stava 3), Člana 6. i Člana 7. ovog pravilnika, Centar za edukaciju trenera će naknadno izdati takmičarsku akreditaciju.

Takmičarske akreditacije i odgovarajući nivo takmičenja

Član 12.

I) Takmičarskom akreditacijom „PRO“ trener stiče pravo rada kao:

- Prvi trener u klubovima Premijer lige BiH, Prve lige Federacije BiH i Prve lige Republike Srpske;
- Sa svim uzrastnim kategorijama i nivoima takmičenja za koje stiče pravo rada trener sa „A“ i „B“ takmičarskom akreditacijom.

II) Takmičarskom akreditacijom „A“ trener stiče pravo rada:

- Kao prvi trener u klubovima Premijer lige BiH, od sezone 2012/13 važiti će samo takmičarska akreditacija „Pro“;
- Kao šef programa za razvoj omladinskog fudbala/nogometa klubova Premijer lige BiH;
- Kao prvi trener u klubovima Prve lige Federacije BiH i Prve lige Republike Srpske od sezone 2013/14 važiti će samo takmičarska akreditacija „Pro“;
- Sa prvim timom klubova, Premijer lige BiH, Prve lige Federacije BiH i Prve lige Republike Srpske u svojstvu asistenta-pomoćnog trenera;
- Sa ženskim klubovima Premijer lige BiH, Prve lige Federacije BiH i Prve lige Republike Srpske;
- Sa prvim timom klubova druge lige Federacije BiH i druge lige Republike Srpske;
- Sa svim uzrastnim kategorijama i nivoima takmičenja za koje stiče pravo rada trener sa takmičarskom akreditacijom „B“;

III) Takmičarskom akreditacijom „B“ trener stiče pravo rada:

- Šef programa za razvoj omladinskog fudbala/nogometa klubova Premijer lige BiH, od sezone 2012/13 važiti će samo takmičarska akreditacija „A“;
- Sa uzrastima U-18, U-16, U-14, U-12 i U-10 klubova Premijer lige BiH, Prve lige Federacije BiH i Prve lige Republike Srpske;
- Sa prvim timom klubova Premijer lige BiH u svojstvu asistent/pomoćni trener, od sezone 2012/13 važiti će samo takmičarska akreditacija „A“;
- Sa ženskim klubovima Premijer lige BiH, Prve lige Federacije BiH i Prve lige Republike Srpske od sezone 2013/14 važiti će samo takmičarska akreditacija „A“;
- Sa djecom uzrasta 6-12 godina u školama nogometa/fudbala i klubovima svih nivoa takmičenja u Bosni i Hercegovini;
- Sa svim uzrasnim kategorijama i nivoima takmičenja u Futsalu u Bosni i Hercegovini;
- Sa svim uzrasnim kategorijama i nivoima takmičenja u ženskom nogometu/fudbalu u Bosni i Hercegovini;
- Sa svim uzrasnim kategorijama kantonalnih, regionalnih i područnih nivoa takmičenja u BiH.

Član 13.

Treneri reprezentativnih selekcija ne trebaju posjedovati takmičarske akreditacije, nego UEFA licence regulisane Pravilnikom o radu reprezentativnih selekcija.

Član 14.

Za trenere koji rade u klubovima koji su izborili plasman za UEFA-ina klubska takmičenja važe odredbe propisane Pravilnikom o radu reprezentativnih selekcija i Pravilnikom o licenciranju klubova.

III TRENERSKI UGOVORI

Bitni elementi ugovora

Član 15.

Trener i Nogometni/Fudbalski klub (u daljnjem tekstu Klub) zaključuju međusobni ugovor po svojoj slobodnoj volji, ukazanoj potrebi. Ugovor mora sadržavati:

- datum zaključivanja ugovora,
- vrijeme trajanja ugovora
- obaveze trenera prema klubu
- obaveze kluba prema treneru.

Prilikom sklapanja ugovora trener i klub moraju utvrditi međusobna prava i obveze za slučaj raskida ugovora prije isteka roka na koji je ugovor sklopljen.

Član 16.

Vrste ugovora mogu biti: Ugovor o radu (na određeno ili neodređeno vrijeme) ili ugovor o djelu (privremeni i povremeni poslovi)

Član 17.

Trener s važećim ugovorom može zaključiti ugovor s drugim klubom samo pod slijedećim uslovima:

- a) važeći ugovor je istekao ili ističe u roku od mjesec dana
- b) postojeći ugovor je raskinut od strane nadležnog suda
- c) ugovor je raskinut sporazumno.

Ukoliko trener želi potpisati novi ugovor u roku od mjesec dana prije isteka postojećeg ugovora, može u tom razdoblju potpisati samo jedan novi ugovor.

Raskid ugovora

Član 18.

Ugovor prestaje da važi:

- momentom isteka vremena na koji je zaključen,
- sporazumnim raskidom obje strane potpisnice ugovora,
- pismenim jednostranim raskidom od strane trenera ili kluba,
- konačnom odlukom nadležnog organa o raskidu ugovora i
- po sili zakona.

Član 19.

Sporove između kluba i trenera rješava nadležni sud naveden u ugovoru.

Član 20.

Ovim pravilnikom se obavezuju svi klubovi i škole nogometa/fudbala su dužni da postupaju po ovome pravilniku.

IV PRELAZNE ODREDBE

Član 21.

Pravilnik stupa na snagu danom objave u Službenom glasniku N/FS BiH, a klubovi i savezi svih nivoa takmičenja su dužni da u roku od 60 dana svoje propise, usklade sa ovim Pravilnikom računajući od dana objave. Stupanjem na snagu ovog Pravilnika prestaju da važe propisi koji su regulisali ovu problematiku.

PREDSJEDNIK NS/FS BiH

Ivan Osim, sr.